

ANTZERKIA. Bihar hasi eta ekainaren 3a bitartean, hamabi emanaldi eskainiko dituzte

Hamar konpainiek hartuko dute parte Debako XV. Antzerkiaren Astean

Antzezlanak, txotxongilo emanaldiak eta kabareta izango dira ikusgai, besteak beste

Jon Gonzalo | **DONOSTIA**

Debako XV. Antzerkiaren Asteak biharkoa izango du estreina-ko eguna. Aurtengo ekitaldian hamar antzerki taldek hartuko dute parte, gehientsuenak amateurak, baina badira profesionalak ere. Antolatzaileen helburua ahalik eta jende kopuru handienera iristea da, eta, horregatik, Zubeltzu zineman, Zaharren Biltokian, gaztetxean eta kalean antolatu dituzte emanaldiak. Guztira, hamabi emanaldi izango dira ikusgai.

Donostiako Bederen 1 taldearen *Lauren eta Hardy zerura bidean* obrak zabalduko du Debako Antzerki Astea. Isidoro Fernandezek zuzendu duen obra horrek Lauren eta Hardy pertsonaien bizipenak kontatzen ditu. Aktore lanetan, Patxi Santamaria eta Inazio Tolosa aritzen dira. Emanaldi hori bihar izango da ikusgai, gaueko 22:30ean, Zubeltzu zineman.

Igandean, Gilkitxaro antzerki talde bizkaitarraren *Trokaolatarrak* izango da ikusgai. Obra hori talde bizkaitarrak sortutako laugarrena da, eta baserri inguruko istorio bati buruz dihardu. Maiatzaren 30ean, berriz, Xabier Munibe Eskola Antzerkiaren txanda izango da, *Antzerki laburrak* emanaldiarekin. Ekainaren 1ean beste antzerki talde baten obra izan-



ZIORTZA MORALES

Gilkitxaro antzerki talde bizkaitarraren *Trokaolatarrak* obra.

go da; hain zuzen ere, Etxebarriko Antzerki taldearen *2000 Zaun KK*. Ekainaren 3an, azkenik, Zurriola Antzerki Eskolak *Nire haurtzaroko lorategia* antzezlan eskainiko du. Obra hori Anartz Zuazuak zuzendu du, eta Azpeitiko Antzerki Topaketetan antzezlan onenaren saria jaso zuen, afizionatuen mailan.

Ohiko antzerki emanaldiez gain, ordea, bestelako antzerki

ikuskizunak ikusteko aukera ere izango da. Maiatzaren 26an, esate baterako, EATAE Euskal Antzerki Talde Amateurren Elkartek *Zakarranka* kale antzerkia eskainiko du.

Pailazoak, txotxongiloak eta kabareta

Maiatzaren 29an, Takolo, Pirritx eta Porrotx pailazoek *Parrandan* ikuskizuna emango dute. Maiatzaren 31n *Printze*

txikia izeneko txotxongilo emanaldia eskainiko du Elgoibarko Taupada taldeak. Ekainaren 1ean, berriz, Goaz antzerki taldearen taberna giroko *Trabena espektakulua* izango da ikusgai, Itziarko Andutz Biltokian. Ekainaren 5ean, ikuskizun bera Zaharren Biltokian errepikatu-ko dute. Ekainaren 2an, azkenik, Donostiako Kasketa Kabaretak *Neskaopolitan* kabaret tankerako ikuskizuna eskainiko

MUSIKA

Mundu osoan antolatu dituzte Bob Dylanen 60. urtebetetzeko ospakizunak

Agentziak | **NEW YORK**

Mundu osoan zehar hainbat ekitaldi eratu dira egunotan Bob Dylan kantari ezagunaren 60. urtebetetzeko ospatzeko, baina Dylanek berak ez du «inola-ko ospakizun publikotan» parte hartuko, haren bozeramaile Elliot Mintzek iragarri duenez. Bizitza pribatua eta intimitatea gordetzen saiatzen ari da azkenaldian Bob Dylan, eta musikaren munduko jendearekin ahalik eta harreman gutxien izaten saiatzen ari da.

Aurtengo udaberrian Dylanek ez du New York, Los Angeles eta Chicagon emanaldirik egin, EEBBeko beste hiri batzuetan baizik. Udan European zehar egingo du bira bat, ekainaren 24an Norvegiar abiatutik.

Patti Smith, Tracy Chapman eta Sam Shepard Bob Dylanen eraginaz mintzatuko dira datorren larunbatean. New Yorken egingo den mahai inguru batean mintzatuko dira. Indiako Mumbai hirian, berriz, Sangeeta Rao, Suresh Bhojwani, Geetu Raheja eta beste hainbat artistak hartuko dute parte Bob Dylanen omenezko kontzertu batean, haren hainbat kanturen bertsiok eskainiz.

Omenezko diskoak eta liburu biografikoak

Kantariaren omenezko diskoak ere han eta hemen agertzen ari dira, hala Minnesotan nola Japonian, eta bi liburu biografiko ere kaleratuko dira aurki. Horieta bategi Howard Sounes du egile, eta biografia horrek dio Bob Dylanen 1985ean alaba bat izan zuela, Desiree izeneko, Carol Dennis korista ohiarekin. Sounesek dioenez, sekretuan ezkondu ziren Dylan eta Dennis, eta 1992an banandu egin ziren.

1941eko maiatzaren 24an jaio zen, Minnesota estatuko Duluth herrian, Robert Allan Zimmerman, urte batzuk geroago Dylan Thomas poetaren miresmenak Bob Dylan ezizena hartzera bultzatu zuen kantaria.

Txamuskinaren eta Sestaoko Udalaren ekimenez, abian dira Bizkaiko antzerki eskolen lanak jasoko dituzten jardunaldiak

Estibalitz Ezkerra | **BILBO**

Dela ikasleak oraindik aktore ezagunak ez direlako, dela promozio faltagatik, antzerki eskolatan trebatzen dabilen ikasleek jendaurrean aritzeko aukera gutxi izaten dute. Arazo hori konpontzeko asmoz, Txamuskina antzerki taldeak, Sestaoko Udalaren laguntzarekin, *Biharko aktoreak* izeneko jardunaldiak martxan jarri zituen atzo. Egun hauetan eta igandean arte, Bizkaiko lau antzerki eskolen antzezlanak ikusgai izango dira Sestaoko AISS aretoan, arratsaldeko zazpiketatik aurrera. Eskola horiek Barakaldo-koa, Basaurikoa, Portugalete-

koa eta Getxokoa dira. Egutegi arazoak direla medio, jardunaldietan parte hartuko ez duen eskola bakarra Bilboko Juan de Antxieta da.

Portugaleteko Asti-Leku ikastolako haurrek ireki zituzten, atzo, jardunaldiak, *Gabon garratzak* ikuskizunarekin. Gaur BAI Barakaldoko antzerki eskolaren txanda izango da, eta hango ikasleek *Alice in Cyberland* taularatuko dute. Lewis Carrollen ipuinetik abiatutik, lanak teknologia berriak eta gizakiaren noraeza ditu hizpide. Bihar eta etzi, berriz, Basauriko eta Portugaleteko eskolek *Esperando a Beckett* eta *Con el corazon en la mano* obrak an-

tzeztuko dituzte, hurrenez hurren. Jardunaldiak igandean Getxoko ikasleek taularatuko duten *Clasicos informales*-ekin amaituko dira.

Zirkuitua zabaltzeko asmoa

Duela bi urte Gurutzetako kultur etxeak antzerki eskolen aste antolatzea erabaki zuen, eta gaur egun ere gauza bera egiten jarraitu du. Txamuskinakoek, ordea, bide hori indartu behar zela eta eskolen zirkuitua AISSera zabaltzea erabaki zuten. «Azken mailan dabilen ikasleentzat oso garrantzitsua da beren lanak publikoari aurkeztu ahal izatea. Baina antzerki amateurrarentzako zirkuitu-

rik ez dagoenez, ekoiztetxeek zein antzerki konpainiek ez daukate aktore berri hauek ezagutzeko modurik», azaldu zuen Fernando Valgañon Txamuskinako ordezkariak.

Oraindik balorazioak egiteko goizegi bada ere, *Biharko aktoreak* egitasmoaren barruan Euskal Herriko gainontzeko antzerki eskolak zein estatuko zenbait ere jasotzea pentsatzen dabilza antolatzaileak datorren urteari begira.

Bestalde, Sestaoko Udalak AISSeko ikuskizunetarako aretoa konpontzeko 10 milioi pezetako aurrekontua onartu du. Lanak azarorako amaiturik egongo dira.